


ALAHADY faha-6 PAKA - TAONA B



« Tsy misy manam-pitiavana lehibe kokoa noho ny mahafoy ny ainy ho an'ny sakaizany » (Jo. 15: 13)

Ry Kristianina havana, araky ny nantitranterintsika isaky ny Alahady amin'izao ankalazantsika ny vanim-potoanan'ny Paka izao dia misy toetran'i Jesoa manokana atolotry ny Eglisy amintsika amin'ny alalan'ireo vakiteny mba hivelomantsika ny maha-Kristianina antsika. Satria ny Kristianina dia avy amin'ny teny hoe Kristy ka ireo toetran'i Jesoa asongadin'ireo tenin'Andriamanitra no hivelomantsika mandritra ny herinandro, fa indrindra hivelomantsika mandritra ny fiainantsika ka hahaizantsika mampitrapatra ny finoana sy ny fiainana andavanandro mba hahatonga antsika ho Eglisy Olona velona, ho EOV MISIONERA TABERNAKLA VELONA, ho génération mpanorina eo amin'ny fiainantsika. Ho fahazavana sy fanasina tokoa isika amin'ny alalan'ny fanorenantsika izany Eglisy Olona Velona izany feno fahafoizana ka hifampitsimbina sy hifanasoa hikatsaka ny soa iombonana.

Vakiteny I : Asa. 10, 25-26. 34-35. 44-48
Tononkira : Salamo 97
Vakiteny II : 1 Jo. 4, 7-10
Evanjely : Jo. 15, 9-17

Amin'izao Alahady faha-enina ny Paka izao àry dia ny fitiavana nampianaran'I Jesoa sy niainany no tian'ny Eglisy ho tsapantsika sy ho halalinintsika ary hivelomantsika eo amin'ny fiainana. Tsy inona io fitiavana fa ilay fahafoizana sy fanompoana vao noresahintsika teo.

Andriamanitra tsy lavitra no Andriamanintsika, Andriamanitra velona eo anivontsika, Izy ilay mpiandry ondry tsara ary nankalazaintsika tamin'ny Alahady fahatelo sy nodinihintsika fa velona tokoa Izy fa tsy matoatoa. Tsy firehan-kevitra no arahintsika fa Andriamanitra velona eo anivontsika. Fitiavana no mampiavaka Azy, matoa velona Andriamanitra satria mifandray amin'ny rehetra Izy. Iriny ho olona araiky ao Aminy isika satria Andriamanitra fitiavana Izy. Izany no maha-mpiandry ondry tsara an'i Jesoa. Mila mifikitra Aminy isika. Mitoetra ao Aminy foto-boaloboka raha te

hamokatra. Ka ny sedra dia tsy inona fa ny fanadiovana ny rantsana mba hamokatra bebe kokoa. Izany mahatonga antsika milaza ao amin'ny Annexe 3 fa mila diovina ny fihavanana. Tsy maintsy évangélisé raha tiana hitondra antsika amin'ny fanorenana ny maha Olo Araiky antsika Jiaby araka ny fampianaran'ny Antsikliko "Fratelli Tutti".

Ny Fitiavana no asongandin'ireo vakiteny androany. Toetran'Andriamanitra manokana io, raha nahary antsika Andriamanitra dia nahary antsika hitovy endrika Aminy ka izany fitiavana izany no itovizantsika Aminy. Izany no mahatonga ny fianakaviana ho fototry ny fiainana Kristianina satria Eglisy kely izay manorina Eglisy fiombonana ary ny Eglisy fiombonana mitambatra no manorina Eglisy fototra. Ny Eglisy fototra mitambatra no manorina ny Eglisy iraka satria tsy mikombona ny Eglisy izay manambara ny fitiavan'Andriamanitra. Fitiavana mifanohitra amin'ny fitiavan-tena no anirahana antsika hiainana ny maha-Kristianina antsika eo anivon'izao tontolo izao na dia tsy anisan'izao tontolo izao aza isika. Fitiavana maimaim-poana tsy misy takalo.

Ny fitiavana no teny mampifandray ireo vakiteny henontsika androany, miverimberina ny teny hoe fitiavan'Andriamanitra. Io teny fitiavana io no azo amaritana an'Andriamanitra. Raha Kristianina isika mpanara-dia an'i Kristy dia izany koa no mamaritra antsika. Izany no teny hiainantsika handalinantsika ny fiainantsika. Ny fototra sy loharanon'ny fitiavana dia ny fiombonana, ny fifandraisana ao amin'ny Trinite masina ka zary fakan-tahaka ho antsika. Izany no mahatonga antsika fianakaviana ho Eglisy kely, Eglisy kely ao an-trano ny fianakaviana mba hanahaka an'izany Trinite masina izany. Irin'Andriamanitra ho iray ao Aminy isika, io no vocation-ntsika ho iray ao Aminy, ho olo araikeo amin'Andriamanitra.

Ahoana no niainan'i Jesoa izany fitiavana izany mba hanarahantsika Azy koa, mba hianarantsika eo amin'ny fiainantsika?.

Hoy i Jesoa ao amin'ny Evanjely androany : "*Tahaka ny nitiavan'ny Ray ahy no nitiavako anareo koa*". Ny fitiavan'ny Ray dia tsy manavaka, tsy mifidy tavan'olona, tsy manilikilika ary manasoa. Ny fitiavana manasoa ny hafa ary mandray ny hafa araky ny maha izy azy, izany no fitiavana nampianarin'i Jesoa. Izany no nanolorany ny tenany teo amin'ny hazo fijaliana. Izany no Paka, fandalovana miala amin'ny toetra ratsy, ny fitiavan-tena, ny fialonana, ny avonavona izay mahatonga antsika hanangona fotsiny, hanilikilika ny hafa, hanangana rindrana fa ny fitiavana nampianarin'i Jesoa dia ilay fitiavana misokatra amin'ny rehetra amin'ny fanaovana soa, amin'ny alalan'ny fanompoana, amin'ny alalan'ny fifampitsimbinana, amin'ny alalan'ny fijoroana amin'ny marina sy mitady hampiombona mandrakariva. Izany no fitiavana marina niainan'i Jesoa tamin'ny fiainany manontolo ka nampahafantariny antsika mba hiainantsika azy koa eo amin'ny fiainantsika andavanandro. Tsy manao kobaka am-bava I Jesoa. Tsy tia sehoseho I Jesoa fa izay lazainy dia iainany sy tanterahiny. Ampianarin'y ary isika raha tiantsika hamokatra tsara ny fiainantsika, raha tiantsika hahazo ny tena fiadanana, raha miala amin'ny toetra ratsy mahatonga antsika anatin'ny fahasahiranana sy fijaliana dia ampianarin'y isika hoe : "*mitoera amin'ny fitiavako ianareo*". Io fitiavana io no mandrafitra ny fiainantsika, raha mitoetra ao amin'i Jesoa sy itoerany isika dia midika fa miaino ny feony, miaino an'Andriamanitra, miaino an'i Jesoa amin'ny fiainantsika andavanandro.

Raha miaino isika dia tsy an-kandrina fotsiny fa manatanteraka ny sitrak'Andriamanitra, ary izany no tena finoana. Io no velabelarina amin'ny Hafatra Pastôraly n° 8. Olom-pinoana, Olom-

panantenana, Olom-pitiavana. Tsy tany malemy hanorenam-pangady ny finoana fa tany lonaka hiasan'ny fahasoavan'Andriamanitra, izany hoe miasa amintsika ny tenin'Andriamanitra fa indrindra amin'izao Paka izao, amin'izao isika miatrika an'ity KORONTANAVIRUS ity izao. Maniry àry isika mba hiova tokoa ny fiainantsika, amin'izay isika afaka mamaly ireo fanontaniana apetraky ny olona amintsika. Anisan'izany ny hoe : "*inona ny miova aminareo mankalaza ny Paka ?*" Raha mitoetra ao amin'i Jesoa isika ary miaina ny fitiavana tahaka nataon'i Jesoa izany hoe mifankatia tsy hoe "sentiment" fotsiny fa manompo, mikatsaka mandrakariva ny soa ho an'ny hafa ka manilika ny fitiavan-tena, manome toerana ny hafa amin'ny fikarakarana azy indrindra ireo mahantre sy voailikiliky ny fiaraha-monina. Io ilay hiaka tian'I Papa ho tanteraka ao amin'ny Antsikliko Fratelli tutti.

Ny atao hoe mifankatia dia mivelona ny fahamarinana marina amin'ny fifandraisany amin'ny manodidina ka manilika lavitra kosa ny lainga sy ny fitapitaka amin'izay dia handresy amin'ny alalan'ny tsara ireo hikolokolo antsika. Raha mijoro tokoa amin'ny tena fitiavana ao anatin'ny fahamarinana dia hiova ho tsara ny fiainantsika.

Milaza miara-mahita isika fa ny lainga no manapotika ny fiaraha-monintsika ka mahatonga antsika mifamono. Raha génération mpanorina àry isika dia tsy maintsy mampanjaka ny rariny sy ny hitsiny satria izany no mitondra antsika amin'ny fanorenana ny MAHA OLO ARAIKY ANTSIKA JIABY = FRATELLI TUTTI. Tanteraka izany raha tena EOV MISIONERA TABERNAKLA VELONA isika izany hoe mivelona eo anivon'izao tontolo ilay fitiavana nampianaran'I Kristy, fitiavana mahafoy, fitiavana manompo.

Mety hanontany antsika hoe aiza ny angovo hahafahantsika mivelona an'izany. I Jesoa ihany ao amin'ny Evanjely no manambara amintsika fa Izy no nifydysy antsika ka Izy efa nandresy ny ratsy. Hahazo ireo fanomezan'ny Fanahy Masina isika ho entintsika mivelona an'izany. Ry Kristianina havana, efa miandranda sahady ny fankalazana ny Pantekoty isika, I Kristy nifydysy antsika dia manambara fa manome antsika ny fanahiny Izy ka hahatonga antsika hivelona an'izay rehetra nataony ary hahatonga antsika ho apôstôly eo amin'ny manodidina antsika, hahatonga antsika ho EOV MISIONERA TABERNAKLA VELONA MANORINA NY FRATELLI TUTTI = OLO ARAIKY ISIKA JIABY. Ho tahaka Azy isika araky ny ampianarin'ny asan'ny apôstôly rehefa mivelona an'izany tena fitiavana izany araky ny voalaza ao amin'ny vakiteny voalohany izay lazain' i Piera fa tsy mizaha tavan'olona Andriamanitra fa tadiaviny isika hivelona ny fitiavany. Izay matahotra Azy sy manao ny marina dia ankasitrahany'Andriamanitra ka tonga ho anisan'ny fianakaviam-ben'Andriamanitra, fianakavian-janahary. Tanteraka izany raha mifanasoa, mifampsimbina isika.

Anisany kriteria hahafahantsika mahalala fa miroso amin'ny lalindalina kokoa amin'ny fanorenana ny ho EOV isika dia isika mankasitraka an'Andriamanitra, matahotra an'Andriamanitra, manao ny marina.... Antsoin'Andriamanitra ho iray ao Aminy tokoa isika araky ny taratasin'ny Asan'ny Apostoly. Ho feno Fanahy Masina isika amin'ny fanorenana ny Eglisy Olona Velona ary azo lazaina fa manomana antsika sahady amin'ny fankalazana ny Pantekoty izany satria ny Pantekoty dia sady fandraisana ny Fanahy Masina ka nampiombona tokoa tamin'I Kristy nitsangan-ko velona no fanirahana an'ireo Apostoly hanorina ny Eglisy. Irintsika ho fenon'ny Fanahy Masina koa isika amin'ny filan-kevitra pastôraly tanterahintsika ka ho Pantekoty vaovao tokoa ny fankalazana Pantekoty amin'ity na dia ao anatin'ny sedra mafy aza isika amin'izao Krizy maro lafy iainantsika izao vokatr'ity KORONTANAVIRUS ity.

Ry Jesoa Tomponay ô, mazava ny fampianaranao ary tsy nanao kobaka am-bava lanao raha nampianatra anay ny tena fitiavana fa nanolo-tena araky ny voalazanao “*Tsy misy manam-pitiavana lehibe kokoa noho ny mahafoy ny ainy ho an'ny sakaizany. Ianareo no sakaizako, raha manatanteraka izay andidiako anareo. Tsy ataoko hoe mpanompo intsony ianareo, satria ny mpanompo tsy mahalala izay ataon'ny tompony; fa efa nataoko hoe sakaiza ianareo, satria efa nambarako taminareo avokoa izay rehetra reko tamin'ny Raiko. Tsy ianareo no nifidy Ahy, fa Izaho no nifidy anareo, ka nanendry anareo mba handehananareo sy hahavokaranareo, ary haharetan'ny vokatrareo, sy hanomezan'ny Raiko anareo izay rehetra hangatahinareo amin'ny Anarako. Ny andidiako anareo dia ny mba hifankatiavanareo*”.

Ampio àry izahay fa indrindra amin'izao fankalazana ny Paka izao, mba tsy ho Paka fankalazana ety ivelany fotsiny fa mba ho latsa-paka amin'ny fiainanay izany fihavaozana entin'ny Paka izany. Maro ny mpanao politika sy mpanao soa vahoaka manomana rafi-piainana hahafahana mifankatia marina tokoa, koa ampio izy ireo mba ho araky ny fampianaranao tokoa no hanorenana ny fampandrosoana izay mbola lavity ny fitadiavana ny tombontsoa ho an'ny vahoaka. Ampio izahay hahay hivelona ny hafatrao ka hahatonga anay ho fanasina sy fanazavana. Ampio izahay ho vonona hahafoy sy hanompo fa izany no tena POLITIKA LAVORARY hoy ny Papa. Tompo ô ataovy manahaka ny fonao ny fonay, ataovy mitovy amin'ny angovon'ny fitiavanao ny fitiavanay ka hahafoy tokoa izahay ary haharitra ho vavolombelonao, ho feno fanetren-tena hanompo ka hiaraka hampanjaka ny rariny sy ny hitsiny eo anivon'ny Eglisy Olona Velona eo amin'ny fiainanay andavanandro. Ankininay manokana ny firenenay izay mandalo fotoan-tsarotra. Feno tebiteby izahay satria tsy manjaka ny famindram-po sy ny fifamelan-keloka fa ny fitiavan-tena no zary fenitra. Ovao ny fonay. Masina Maria Reny ô mivavahà ho anay mba hanahaka an'I Jesoa zanakao izahay. Md Josefa ô mivavahà ho an'izay manampahefana rehetra mba banana FON-DRAY tokoa ka hanompo fa tsy hotompoina. Amen

Mompera Arseveka Mgr Benjamin Ramaroson